

NBL

STATUT
NEZAVISNE BOSANSKOHERCEGOVAČKE LISTE

Sarajevo, 29. septembar 2019. godine

I - OPĆE ODREDBE

Član 1.

Ovim Statutom uređuju se pravni status, naziv i sjedište, predstavljanje i zastupanje, prava, obaveze i odgovornost članova/ica Nezavisne bosanskohercegovačke liste (u daljem tekstu : NBL), organi, organizaciona struktura, poslovanje, prestanak rada, te ostala pitanja od značaja za rad NBL-a.

Član 2.

NBL je politička stranka. Njen puni naziv je *Nezavisna bosanskohercegovačka lista*, a skraćeni naziv je NBL. Sjedište stranke je u Sarajevu (ul. Obala Kulina bana br. 24/2).

Član 3.

NBL ima znak, pečat i zastavu.

Pečat NBL-a je okrugao. U njegovom središtu je znak NBL. Puni naziv Nezavisna bosanskohercegovačka lista (i latinicom i ćirilicom) ispisan je u obodnome krugu. Osim pečata iz stava 2. ovog člana pečat imaju i niži organi NBL-a (općinske organizacije). Pečat je okruglog oblika promjera 30 mm sa tekstem ispisanim u koncentričnim krugovima: " Nezavisna bosanskohercegovačka lista " i nazivom općinske organizacije u sredini.

Za potrebe rada NBL može imati i druge pečate i štambilje.

Sadržaj pečata, broj pečata, davanje odobrenja za izradu pečata, upotreba pečata, način vođenja evidencije o izdatim pečatima, način uništenja i druga pitanja od značaja za izradu i korištenje pečata i štambilja uredit će se posebnom odlukom Predsjedništva NBL-a.

NBL ima znak (amblem) i zastavu.

Primarni Logotip NBL-a se sastoji od znaka i punog naziva stranke.

Znak (amblem) NBL-a je trodimenzijalno slovo „N“

Boje: Znak je obojen prelivom boja, tamno plava, preko zelene te završava sa jarkom žutom bojom.

Puni naziv stranke se piše u fontu „Impact“ Boja; C:100 M:100 Y:26 K:25

Zastava NBL-a je bijele boje sa ambblemom i punim nazivom stranke (Nezavisna bosanskohercegovačka lista)

Član 4.

NBL je demokratska politička stranka koja djeluje u skladu sa bosanskohercegovačkim zakonima, te ovim Statutom i programskim dokumentima.

Stranku u javnom i političkom životu predstavlja i zastupa Predsjednik stranke.

Član 5.

NBL djeluje u Bosni i Hercegovini i inostranstvu. Otvorena je za sve bosanskohercegovačke građane koji prihvataju ovaj Statut i dokumente NBL-a.

Član 6.

NBL ima svojstvo pravnog lica, koje stiče upisom kod nadležnog organa u skladu sa zakonima BiH.

II - NAČELA I CILJ

Član 7.

NBL djeluje u skladu sa načelima društvene pravde, slobode i jednakosti za sve ljude. Zalaže se za održavanje i razvoj vladavine prava u skladu sa postojećim ustavnim poretom, te mogućnostima njegove promjene u okviru demokratskih procedura u legitimiranju svih oblika vlasti.

Član 8.

Cilj NBL-a je razvoj bosanskohercegovačkog političkog poretka kao najboljeg interesa bosanskohercegovačkih građana. Najvažniji sadržaji u realiziranju tog cilja su:

Zagovaranje poželjne političke, kulturne i ekonomske budućnosti bosanskohercegovačke države kao izazovne i privlačne vizije općeg dobra za sve njene ljude;

Zagovaranje vizije političke budućnosti bosanskohercegovačke države koju će najvitalniji dio njenih građana prihvatiti kao dobro koje je njihovo vlasništvo i koje oni štite i razvijaju;

Zaštita bosanskohercegovačkog državnog suvereniteta u funkciji osiguranja temeljnih prava bosanskohercegovačkih građana i svih njihovih kolektivnih pripadanja;

Zagovaranje i zaštita kulture mira i solidarnosti unutar svih oblika pluralnosti bosanskohercegovačkog društva;

Zagovaranje i razvoj svih oblika saradnje u skladu sa načelima mira, poštovanja i solidarnosti sa svim državama u svijetu, a naročito sa državama u susjedstvu;

Zagovaranje i podržavanje svih procesa i oblika državnog povezivanja kojima se proširuje politička, kulturna i ekonomska uključenost bosanskohercegovačke države u evropske i svjetske integracijske procese, a prije svega u Evropsku uniju i NATO;

Realiziranje svih oblika političkog projekta u službi najboljeg interesa građana kao pojedinaca, porodice i svih oblika slobode u pojedinačnim i kolektivnim pripadanjima;

Optimiziranje odnosa među svim nivoima vlasti, ali uvijek na temelju prvenstva interesa pojedinca i njegovog života u lokalnoj zajednici;

Otklanjanje svih oblika diskriminacije na osnovu rodnog, rasnog, etničkog, vjerskog, seksualnog i generacijskog pripadanja;
Zagovaranje odgovornosti prema položaju najugroženijih dijelova bosanskohercegovačkog društva (djeca i starci, invalidi i bolesni, itd.);

Suprotstavljanje svim oblicima otuđenja političke vlasti od najboljeg interesa građana i to u onim okolnostima gdje oni konkretno žive;

Zagovaranje širenja prostora zakonom garantirane društvene pravde na svim nivoima državnog poretka;

Odlučno suprotstavljanje svim oblicima zloupotrebe političke vlasti u nezakonitim realiziranjima individualnih i grupnih interesa;

Zagovaranje i zaštita slobode govora i udruživanja na svim nivoima društva;

Zagovaranje i zaštita jednakosti svih bosanskohercegovačkih građana pred zakonom i u pristupu javnim dobrima i službama, uključujući sve službe državnog poretka od mjesne zajednice do državnog predsjedništva;

Razvijanje i zaštita demokratskih procedura, demokratske kulture i demokratskog legitimiranja svih oblika društvenog organiziranja;

Zagovaranje i zaštita prava vlasništva i komplementarnih odnosa među različitim oblicima usklađivanja privatnog i javnog područja;

Rekonstituiranje nepovredivosti prava na privatnost u životu i svojini i to u skladu s evropskim standardima;

Zagovaranje i zaštita različitih oblika tolerancije, antiradikalizma i uključivosti koji omogućuju načela društvene pravde, slobode, jednakosti i demokratije;

Valoriziranje i zaštita pluralnog bosanskohercegovačkog kulturnog i prirodnog naslijeđa u skladu s najboljim iskustvima savremenog svijeta;

Zagovaranje i razvoj sistema obrazovanja u skladu s najboljim iskustvima savremenog svijeta;

Zagovaranje i razvijanje sistema zdravstvene zaštite u skladu sa najboljim iskustvima savremenih društava;

Suprotstavljanje svim oblicima djelovanja i korištenja organa vlasti u njihovom otuđenju od konkretnih interesa građana u njihovim pravima na društvenu pravdu, slobodu, jednakost i učešće u svim postupcima demokratskog odlučivanja.

Član 9.

Načela i cilj/evi NBL-a navedeni u članu 8. ovog Statuta bit će predstavljeni u programskim dokumentima, donesenim na nadležnim stranačkim organima.

Član 10.

NBL realizira svoj cilj u skladu sa demokratskim procedurama i učešćem u izborima za sve organe zakonodavne i izvršne vlasti u Bosni i Hercegovini, te u tim organima u skladu s izbornim rezultatima.

Član 11.

NBL može stupati u saveze s drugim političkim organizacijama, te postajati članicom bosanskohercegovačkih i inostranih asocijacija i to u skladu s bosanskohercegovačkim zakonima.

III - ČLANSTVO

Član 12.

Član/ica NBL-a može biti svaki punoljetni/a građanin/ka Bosne i Hercegovine koji nije član druge političke partije.

Članstvo u NBL-u može biti redovno i počasno.

Član 13.

Članom/icom NBL-a postaje osoba koja potpiše pristupnicu i tako potvrdi prihvatanje Statuta stranke i programskih dokumenata, a nakon što tako izraženu volju prihvati nadležni stranački organ i tu osobu upiše u Centralni registar članova NBL-a.

Redovni/e članovi/ice NBL-a s prebivalištem u Bosni i Hercegovini u pravilu su organizovani prema mjestu vlastitog prebivališta, odnosno u najbližem organizacionom obliku NBL-a ukoliko u mjestu prebivališta ne postoji organizacioni odbor NBL-a (mjesna ili općinska organizacija).

Počasnim članom/icom može postati osoba koja u svom političkom djelovanju podržava ideje za koje se zalaže NBL i koja je svojim javnim istupima i neposrednim djelovanjem promovirala i podržavala NBL u zemlji i inostranstvu. Počasni članovi/ice NBL-a imaju sva prava redovnih članova/ica, osim prava da biraju i budu birani/e, u skladu sa ovim Statutom.

Član 14.

Član/ica NBL-a ima pravo da bira i bude biran/a u sve stranačke organe, da bude obaviješten/a o svim planovima i rezultatima rada.

Član 15.

Član/ica stranke ima obavezu da štiti ugled NBL-a, da zastupa i širi stranačke stavove definirane ovim Statutom, programskim dokumentima i odlukama organa NBL-a.

Stručna služba NBL-a o svim članovima vodi Centralni registar članstva NBL-a. Članovima/icama NBL-a, nakon provedene procedure prijema u članstvo i upisa u Centralni registar članstva NBL-a, izdaje se članska kartica.

Član 16.

Član NBL-a briše se iz evidencije članstva u slučaju:

- pismeno izražene volje člana/ice
- nepoštovanja ili kršenja obaveza utvrđenih ovim Statutom i drugim stranačkim dokumentima
- učlanjenja u drugu političku stranku,
- kandidovanja na listi druge političke stranke, nezavisnoj listi ili kao nezavisni kandidat bez saglasnosti organa NBL-a,
- napuštanja kluba poslanika odnosno vijećnika/odbornika NBL-a u predstavničkom tijelu,
- ako godinu dana ne plaća članarinu i ako svoju obavezu ne izvrši u roku od 30 dana od dana dostavljanja pisanog upozorenja.
- smrću člana/ice

Odluku o brisanju iz evidencije donosi općinski/gradski izvršni odbor.

Član NBL-a može u roku od 15 dana, od dana dostavljanja odluke iz prethodnog stava, uložiti prigovor. O prigovoru odlučuje Etički odbor u roku od 60 dana od dana podnošenja žalbe. Odluka Etičkog odbora je konačna i ne može se pobijati pred drugim organima NBL-a.

Svako kome je prestalo članstvo u NBL-u dobit će pismenu ispisnicu i bit će brisan iz Centralnog registra NBL-a.

Odluku o isključenju iz članstva isključenoj osobi šalje preporučenom poštom Stručna služba NBL-a.

Član 17.

Članovi/ce NBL mogu biti i osobe koje nisu nastanjene u Bosni i Hercegovini, ali imaju status bosanskohercegovačkih građana i pravo učešća (aktivno i pasivno biračko pravo) na Općim i Lokalnim izborima u BiH.

Član 18.

Mjesto stanovanja u Bosni i Hercegovini ne ograničava pravo učlanjenja u NBL. Dvostruka registracija nije dopuštena.

Član 19.

Registar NBL članova/ica je jedinstven i javan, a vodi ga Stručna služba NBL-a.

Član 20.

Članu/icama NBL-a člansku kartu izdaje Stručna služba NBL-a.

Član 21.

NBL član/ica je dužan/a plaćati godišnju članarinu, o čijem iznosu za svaku godinu odlučuje nadležni NBL organ. Iznosi članarine su diferencirani shodno društvenom statusa članova/ica.

Član 22.

Odluku o oduzimanju ili suspenziji članstva u NBL-u zbog nepoštivanja ili kršenja obaveza utvrđenih ovim Statutom i drugim NBL dokumentima donosi Predsjednik NBL-a, a u slučaju njegovog odustva odlučuje Predsjedništvo NBL-a.

Član 23.

Svi kandidati NBL-a koji osvoje i prihvate mandat zastupnika-ce/vijećnika-ice/odbornika-ice u zakonodavnom tijelu, budu imenovani/ne u izvršnu vlast ili na visoke pozicije u agencijama i državnim preduzećima, dužni su potpisati ugovor/izjavu koji je obavezujući, a odnosi se na političko djelovanje u skladu sa Statutom i Programom NBL-a.

Ukoliko zastupnik-ca/vijećnik-ica/odbornik-ca ili imenovani/a na pozicije u izvršnu vlast ili na visoke pozicije u agencijama i državnim preduzećima u toku trajanja mandata promijeni stranku ili pređe u samostalne zastupnike-ce/vijećnike-ce/odbornike-ce bit će isključen/a iz članstva NBL-a. Od njega/nje će biti zatraženo i da podnese ostavku na zastupničku/vijećničku/odborničku dužnost, odnosno funkciju u izvršnoj vlasti, ili visoku poziciju u agencijama i državnim preduzećima, te da ispuni svoje finansijske obaveze prema NBL-u, a koje su definirane ugovorom/izjavom.

Iz članstva se isključuje osoba koja se kandiduje na listi druge političke partije ili kao samostalni kandidat i to bez saglasnosti organa NBL-a.

IV - ODLUČIVANJE I TRAJANJE MANDATA

Član 24.

Organi NBL-a punovažno zasjedaju i odlučuju kada je prisutno više od polovine od ukupnog broja njihovih članova, a Kongres ako je prisutno više od dvije trećine od ukupnog broja delegata Kongresa.

Organi NBL-a donose odluke većinom glasova prisutnih članova, osim ako ovim Statutom nije drugačije određeno.

Glasanje u organima NBL-a u pravilu je javno, osim u slučajevima za koje je ovim Statutom drugačije određeno.

Kada organi NBL-a zasjedaju u funkciji izbornog tijela, odluke se donose u skladu sa Pravilima izbornog postupka.

Mandatni period za sve funkcije, osim funkcije Predsjednika i Potpredsjednika stranke, u svim organima NBL-a i organima svih nivoa organizovanja, uključujući i posebne oblike organiziranja je četiri godine.

Mandat organa i članova organa NBL-a izabranih na vanrednim izborima traje do redovnih izbora.

Vršenje funkcije kraće od dvije godine ne smatra se mandatom.

Predsjednik NBL-a ima pravo zaustaviti izvršenje odluke i/ili drugog akta organa NBL-a na nižim nivoima, te odluke odbora i komisija NBL-a i nosilaca funkcija u organima NBL-a, za koje smatra da su u suprotnosti sa Statutom, Programom i drugim odlukama organa NBL-a, a čija bi primjena nanijela štetu ugledu i/ili drugu štetu NBL-u.

V - ORGANIZACIONA STRUKTURA I ORGANI

Član 25.

NBL kao jedinstvena politička organizacija svoje političko djelovanje i aktivnosti ostvaruje putem:

- organa i tijela NBL-a,
- teritorijalnih organizacija NBL-a: mjesni odbori, općinska/gradska organizacija i koordinacioni odbor.

a) ORGANI I TIJELA

Član 26.

Organi NBL-a su: Kongres, Konvencija, Glavni odbor, Predsjedništvo, Predsjednik i Etički odbor.

Organima NBL-a u radu pomažu: potpredsjednici NBL-a, Kolegij NBL-a, Generalni sekretar, Stručna služba, Komisije NBL-a i Forum mladih.

Član 27.

Svi organi i tijela NBL-a na svim nivoima, donijet će poslovnike o radu u kojima će, u skladu sa ovim Statutom, urediti pravila svog rada.

1. Kongres

Član 28.

Najviši organ NBL-a je Kongres.

Kongres čine delegati koji se biraju na izborima i delegati po položaju.

Delegati po položaju su:

- Predsjednik/ca i potpredsjednici
- Članovi Glavnog odbora, Predsjedništvo,
- generalni sekretar NBL-a
- predsjednici/ce općinskih odbora
- predsjednici/ce regionalnih odbora
- izabrani predstavnici NBL-a u općinskim vijećima/skupštinama općina jedinica lokalne samouprave, općinski načelnici/ice, te zastupnici/e u državnim, entitetskim i kantonalnim zakonodavnim tijelima.
- izabrani predstavnici/e lokalnih organizacija NBL-a

Delegat Kongresa na izborima biraju općinske/gradske organizacije nakon provedene kandidature na neposrednim izborima.

Broj delegata iz pojedinih općinskih organizacija utvrđuje i potvrđuje Predsjedništvo NBL-a na osnovu kriterija koji se temelje na izbornim rezultatima.

Član 29.

Kongres može biti redovni i vanredni.

Odluku o sazivanju Kongresa donosi Glavni odbor na prijedlog Predsjednika stranke.

Odlukom Glavnog odbora NBL-a utvrđuje se prijedlog dnevnog reda i osnovna pitanja pripreme i organizacije Kongresa NBL-a.

Prijedloge dokumenata koje razmatra Kongres NBL-a utvrđuje Glavni odbor NBL-a na prijedlog predsjedništva stranke.

Kongres NBL-a saziva i rukovodi njegovim radom do izbora Radnog predsjedništva Kongresa, Predsjednik NBL-a i Predsjedništvo NBL-a.

Član 30.

Vanredni kongres NBL-a se saziva na prijedlog Predsjedništva stranke.

Vanredni Kongres saziva se kada Predsjedništvo stranke odluči da je to neophodno zbog izuzetnih prilika u državi Bosni i Hercegovini ili u NBL-u.

Odluku o održavanju Vanrednog kongresa donosi Predsjedništvo stranke dvotrećinskom većinom od ukupnog broja članova.

Vanredni kongres mora se sazvati najkasnije tri sedmice prije njegovog održavanja.

Prijedlozi odluka i drugih dokumenata za Vanredni kongres dostavljaju se delegatima najmanje tri dana prije održavanja kongresa.

Vanredni Kongres radi po Poslovniku o radu redovnog kongresa.

Član 31.

Kongres NBL-a vrši verifikaciju mandata delegatima Kongresa, bira Radno predsjedništvo Kongresa i donosi Poslovnik o radu Kongresa .
Kongres punovažno odlučuje ako je prisutno više od 2/3 delegata Kongresa.
Kongres donosi odluke većinom glasova prisutnih delegata Kongresa.
Izuzetno od odredaba prethodnog stava ovog člana, Kongres dvotrećinskom većinom verifikovanih delegata Kongresa, donosi i mijenja Statut i Program.

Član 32.

Kongres NBL-a je nadležan da:

- usvaja i mijenja Statut NBL-a,
- usvaja i mijenja Program rada i djelovanja NBL-a,
- donosi odluke o prijedlozima upućenim Kongresu
- donosi smjernice i stavove za djelovanje organa i članova NBL-a između dva Kongresa,
- razmatra i ocjenjuje rad NBL-a i njegovih organa između dva Kongresa (Izvještaj o radu predsjednika NBL-a, Glavnog odbora i Etičkog odbora),
- bira i razrješava Predsjednika NBL-a i Potpredsjednike,
- bira i razrješava dio članova Glavnog odbora koji to nisu po položaju,
- bira i razrješava Etički odbor,
- donosi druge akte opšteg karaktera,
- razmatra i druga pitanja koja su od važnosti za uspješno djelovanje NBL-a.

2. Konvencija

Član 33.

Konvencija NBL-a je povremeni organ NBL-a.
Predsjednik donosi odluku o mjestu i vremenu održavanja Konvencije.

Član 34.

Delegati Konvencije su:

- Predsjednik NBL-a, članovi Glavnog odbora i Predsjedništva NBL-a, članovi Etičkog odbora, predsjednici općinskih/gradskih odbora, članovi Koordinacionog odbora, poslanici i delegati NBL-a u zakonodavnim organima države Bosne i Hercegovine i entiteta.

Član 35.

Konvencija može donositi odluke iz nadležnosti Kongresa NBL-a. Konvencija može odlučiti da izabranim funkcionerima i organima stranke produži mandat do održavanja Kongresa, a najduže dvije godine.

3. Glavni odbor

Član 36.

Najviši organ NBL-a između dvije sjednice Kongresa je Glavni odbor NBL-a.

Glavni odbor:

bira predsjednika/icu Glavnog odbora, brine o izvršavanju odluka Kongresa, daje političke ocjene i utvrđuje političke stavove NBL-a na državnom, entitetskom i kantonalnom nivou, donosi opće akte Stranke,

donosi odluku o načinu izlaska Stranke na izbore na državnom, entitetskom i kantonalnom nivou, usvaja godišnji budžet Stranke i izvještaj o ostvarenju budžeta, usvaja planove i izvještaje o poslovnoj aktivnosti i politici NBL-a, daje saglasnost o osnivanju odbora Stranke u inostranstvu, donosi odluku o osnivanju stručne službe, preduzeća, agencije ili drugih oblika obavljanja privredne djelatnosti, po potrebi osniva radna tijela za rješavanje pitanja iz svoje nadležnosti (komisije, savjeti i sl.), na prijedlog Predsjedništva stranke imenuje predsjednike/ice i članove/ice

Nadzornih odbora preduzeća čiji je većinski vlasnik stranka, ocjenjuje statutarnost akata i odluka organa NBL-a, daje tumačenje Statuta NBL-a, odlučuje i o drugim pitanjima vezanim za rad NBL-a, koji Statutom ili drugim općim aktima nisu stavljeni u nadležnost drugim organima.

Glavni odbor se sastoji od : osamnaest (18) članova/ica koje imenuje Glavna skupština na svojoj sjednici na način da se iz svake regije imenuje po tri (3) člana/ice i od svih nosioca mandata na državnom i entitetskom nivou.

Glavni odbor se sastaje po potrebi, a najmanje dva puta godišnje. Glavni odbor može punovažno odlučivati ako mu prisustvuje dvije trećine (2/3) članova, a odluke se donose natpolovičnom većinom glasova prisutnih.

Predsjednik/ca Glavnog odbora:

- priprema, saziva i predsjedava sjednicom Glavnog odbora
- predlaže sastav komisija koje formira Glavni odbor
- stara se o provođenju politike i odluka Glavnog odbora
- predstavlja stranku po ovlaštenju i zastupa njene interese.

Mandat predsjedniku/ci i članovima/cama Glavnog odbora traje pet (5) godina. Mandat u Glavnom odboru nosiocima mandata ističe gubitkom mandata na državnom ili entitetskom nivou, odnosno nastupa početkom mandata na državnom ili entitetskom nivou.

Predsjednik i zamjenici predsjednika Glavnog odbora, u saradnji sa Predsjednikom, Generalnim sekretarom, Predsjedništvom NBL-a, staraju se o provođenju odluka Glavnog odbora.

Glavni odbor statutarne odluke donesene između dva Kongresa podnosi na verifikaciju sljedećem Kongresu NBL-a.

4. Predsjedništvo

Član 37.

Izvršno-politički organ NBL-a je Predsjedništvo NBL-a.

Predsjedništvo stranke - Predsjedništvo NBL-a broji 17 članova/ica, uključujući predsjednika/cu i šest potpredsjednika/ce. Od sedamnaest (17) članova/ica Predsjedništva stranke najmanje su tri (3) žene.

Predsjedništvo zasjeda u sjednicama koje mogu biti redovne i vanredne.

Sjednice saziva Predsjednik NBL-a, a u slučaju njegove spriječenosti jedan od potpredsjednika, kojeg on ovlasti.

Konstituirajuća sjednica Predsjedništva mora se održati najkasnije u roku od 15 dana od dana potvrđivanja izbora za članove Predsjedništva.

Redovne sjednice se održavaju najmanje jednom u 30 dana.

Predsjednik NBL-a je dužan sazvati vanrednu sjednicu Predsjedništva i na zahtjev 1/3 članova Predsjedništva, sa dnevnim redom kojeg su podnosioci zahtjeva dostavili.

Ukoliko Predsjednik NBL-a ne sazove vanrednu sjednicu u roku od 15 dana od dana podnošenja zahtjeva, sjednicu će sazvati potpredsjednik kojeg ovlaste podnositelji zahtjeva.

Način svog rada i odlučivanja, Predsjedništvo će urediti Poslovníkom o radu Predsjedništva kojeg donosi na konstituirajućoj sjednici.

Član 38.

Predsjedništvo NBL-a je nadležno da:

- izvršava odluke i provodi stavove Kongresa, Konvencije i Glavnog odbora NBL-a,
- utvrđuje nacрте odluka i drugih akata koje donosi Kongres,
- utvrđuje prijedloge akata koje donosi Glavni odbor ili Konvencija NBL-a u okviru svojih ovlaštenja,
- donosi odluke i zauzima stavove o aktuelnim političkim i drugim pitanjima,
- vodi brigu i raspolaze imovinom NBL-a u skladu sa Statutom i drugim opštim aktima NBL-a (donošenjem pojedinačnih ili općih odluka, zaduženja i sl.),
- razmatra i usvaja godišnji finansijski plan NBL-a,
- razmatra i usvaja izvještaje o finansijskom poslovanju NBL-a,
- donosi Pravilnik o organizaciji i sistematizaciji Stručnih službi NBL-a, Pravilnik o materijalno- finansijskom poslovanju i druge opšte akte NBL-a, za koje je ovlašten Statutom ili odlukom Glavnog odbora,
- donosi Pravilnik o ostvarivanju kadrovske politike i Smjernice kadrovske politike,
- imenuje Glavni izborni štab NBL-a,
- donosi odluku o kandidatima za Predsjedništvo BiH, za parlamentarnu Skupštinu BiH, te za parlamente entiteta, predsjednika/potpredsjednike entiteta, mandataru i članove vlade na nivou države i entiteta, predsjednike domova parlamenata, predsjednike klubova poslanika, kao i predsjednika skupštine i premijera kantona,
- daje saglasnost na kandidatske liste za kantonalne skupštine,
- daje saglasnost na kandidatske liste za lokalne izbore u Bosni i Hercegovini,
- daje saglasnost za kandidate za načelnike i gradonačelnike,
- donosi Poslovnik o radu,
- formira svoja radna tijela u skladu sa Poslovníkom,
- ima i druge nadležnosti utvrđene Statutom i drugim opštim aktima, u okviru odluka i naloga Kongresa, Konvencije i Glavnog odbora NBL-a.

Član 39.

Članovi Predsjedništva NBL-a mogu biti zaduženi po pojedinim oblastima i odgovorni za praćenje i predlaganje politike NBL-a u toj oblasti.

Odluku o zaduženjima donosi Predsjedništvo na prijedlog Predsjednika NBL-a.

5. Predsjednik

Član 40.

Predsjednika NBL-a tajnim glasanjem bira Kongres NBL-a.

Kandidat za Predsjednika NBL-a može biti član NBL-a koji podnese prijavu Izornoj komisiji NBL-a koju podržava najmanje 1/2 članova aktuelnog saziva Glavnog odbora ili 15 općinskih/gradskih skupština.

Kandidatsku listu sačinjava Izborna komisija NBL-a, a nakon provedene procedure kandidiranja i ovjere kandidatura, što će se preciznije regulisati Pravilima izbornog postupka.

Izabran je kandidat koji dobije najveći broj glasova.

Član 41.

Predsjednik NBL-a je nadležan da:

- predstavlja i zastupa NBL,
- rukovodi NBL-om i stara se o provođenju odluka Kongresa, Glavnog odbora i Predsjedništva ,
- saziva, predsjedava i učestvuje u radu Predsjedništva te učestvuje u radu Glavnog odbora Stranke, sa pravom glasa,
- pokreće pred organima NBL-a rješavanje političkih i drugih pitanja od važnosti za NBL, njegove ciljeve i Program rada,
- koordinira rad svih organa NBL-a i brine se o provođenju njihovih odluka, zaključaka i drugih akata,
- saziva i rukovodi Kongresom NBL-a do izbora njegovog rukovodstva,
- uz konsultacije sa Kadrovskom komisijom NBL-a, Kongresu predlaže liste kandidata za Etički odbor,
- saziva konstituirajuću sjednicu Glavnog odbora i rukovodi njime do izbora rukovodstva Glavnog odbora,
- uz konsultacije sa Kadrovskom komisijom NBL-a, Glavnom odboru predlaže liste kandidata za Predsjedništvo NBL-a i Generalnog sekretara,
- podnosi izvještaj o radu Kongresu i informacije Glavnom odboru,
- donosi konačnu odluku o sastavu kompenzacijskih lista za sve nivoe izbora u BiH,
- obavlja druge poslove u skladu sa Statutom i drugim aktima NBL-a, te poslove koje mu povjeri Kongres, Konvencija, Glavni odbor i Predsjedništvo NBL-a.

Član 42.

Predsjednik može ovlastiti jednog od potpredsjednika NBL-a da ga mijenja u obavljanju poslova i zadataka iz njegove nadležnosti.

Član 43.

Ako Predsjednik NBL-a iz bilo kojih razloga prestane vršiti svoju funkciju, ili ako je trajno ili privremeno nesposoban (duže od šest mjeseci) za vršenje funkcije, zamijenit će ga jedan od potpredsjednika kojeg odredi Predsjedništvo NBL-a.

6. Etički odbor

Član 44.

Etički odbor NBL-a broji 5 (pet) članova koje tajnim glasanjem bira Glavni odbor NBL-a.

Kandidatsku listu za članove Etičkog odbora sačinjava Predsjednik NBL-a, lista mora sadržavati najmanje dupli broj kandidata od broja koji se bira, a što će se preciznije urediti Pravilima Izbornog postupka.

Izabrano je 5 kandidata koji dobiju najveći broj glasova.

Član 45.

Ako član Etičkog odbora NBL-a iz bilo kojih razloga prestane vršiti svoju funkciju, ili ako je trajno ili privremeno nesposoban (duže od šest mjeseci) za vršenje funkcije, zamjenit će ga sljedeći kandidat sa liste za Etički odbor, prema postignutim izbornim rezultatima na Kongresu, što se konstatuje na sjednici Glavnog odbora.

Mandat člana Etičkog odbora traje do okončanja redovnih izbora u NBL-u.

Član 46.

Etički odbor NBL-a je nadležan da:

- predlaže Glavnom odboru NBL-a Etički kodeks i prati njegovo provođenje,
- odlučuje o izricanju mjera odgovornosti zbog povreda Etičkog kodeksa,
- odlučuje po žalbama na odluke o izricanju mjera odgovornosti.

Član 47.

Etički odbor postupa po službenoj dužnosti i po žalbama članova NBL-a.

Po službenoj dužnosti Etički odbor će postupati ukoliko dobije direktne informacije o kršenju Etičkog kodeksa. Etički odbor je obavezan žalbu na odluku o izricanju mjera odgovornosti riješiti najkasnije u roku od 60 dana od dana podnošenja žalbe.

Član 48.

Postupak pred Etičkim odborom se odvija u dvije faze: pripremni i glavni postupak.

Pripremni postupak je istraživanje i priprema odluke koje će provesti član Etičkog odbora kojeg za taj predmet zaduži Predsjednik Etičkog odbora (izvjestitelj u predmetu).

U provođenju pripremnog postupka potrebnu stručnu pomoć pružat će Stručna služba NBL-a, Komisija za Statut i opća akta i drugi organi i tijela NBL-a od kojih to bude zatraženo.

Glavni postupak odvija se pred Etičkim odborom, a podrazumijeva raspravu o prijedlogu odluke koju je pripremio izvjestitelj u predmetu.

Odluka Etičkog odbora donosi se većinom glasova njegovih članova.

Odluke Etičkog odbora NBL-a su konačne i obavezujuće.

Način rada Etičkog odbora bliže se uređuje Poslovníkom o radu kojeg će na prijedlog Etičkog odbora donijeti Glavni odbor NBL-a.

1. Potpredsjednici

Član 49.

NBL ima 6 (šest) potpredsjednika koje tajnim glasanjem bira Kongres NBL-a. Najmanje dva potpredsjednika će biti sa teritorije manjeg entiteta, a najmanje jedan potpredsjednik će biti pripadnik manje zastupljenog spola.

Kandidati za potpredsjednika bit će lica čiju kandidaturu potvrdi Izborna komisija NBL-a, a nakon što isti budu predloženi od strane najmanje 1/3 članova Glavnog odbora ili 5 općinskih organizacija NBL-a.

Predsjednik NBL-a može predložiti kandidate za potpredsjednika.

Kandidatsku listu sačinjava Izborna komisija NBL-a, a nakon provedene procedure kandidiranja i ovjere kandidatura, što će se preciznije regulisati Pravilima izbornog postupka.

Konačnu listu kandidata za potpredsjednike NBL-a utvrđuje Predsjednik NBL-a. Izabrani su kandidati koji dobiju najveći broj glasova, uz osiguranje teritorijalne i spolne zastupljenosti.

Član 50.

NBL ima 6 (šest) Potpredsjednika/ca.

Potpredsjednici NBL-a su nadležni da:

- pomažu Predsjedniku NBL-a u vođenju NBL-a,
- u koordinaciji sa Predsjednikom pokreću pred organima NBL-a rješavanje političkih i drugih pitanja od važnosti za Bosnu i Hercegovinu i NBL,
- obavljaju druge poslove u skladu sa Statutom i drugim aktima NBL-a, te poslove koje im povjeri Predsjednik.

Član 51.

Ako potpredsjednik NBL-a iz bilo kojih razloga prestane vršiti svoju funkciju, zamijenit će ga kandidat za potpredsjednika NBL-a koji je na izborima za potpredsjednike bio sljedeći po broju glasova, što se konstatuje na sjednici Glavnog odbora.

2. Generalni sekretar

Član 52.

NBL ima Generalnog sekretara kojeg tajnim glasanjem na svojoj konstituirajućoj sjednici bira Glavni odbor.

Kandidatska lista za Generalnog sekretara NBL-a sastoji se od najmanje dva imena kandidata koje predlaže Predsjednik NBL-a, uz konsultacije sa Kadrovskom komisijom.

Izabran je kandidat koji je osvojio najveći broj glasova.

Član 53

Ako Generalni sekretar iz bilo kojih razloga prestane vršiti svoju funkciju, Predsjednik će svojom odlukom imenovati vršioca dužnosti generalnog sekretara do izbora novog generalnog sekretara a najduže na period od 3 (tri) mjeseca.

Član 54.

Generalni sekretar NBL-a je nadležan da:

- rukovodi Stručnom službom, brine o organizaciji rada i stručnom i operativnom izvršavanju poslova i zadataka NBL-a,
 - stara se o političkom i organizacionom jačanju i osposobljavanju organizacija i drugih oblika djelovanja NBL-a,
 - pomaže predsjednicima organa NBL-a u sazivanju sjednica i organizaciji rada,
 - brine se i odgovoran je za izvršavanje odluka Predsjedništva NBL-a, Glavnog odbora NBL-a i Etičkog odbora,
 - usklađuje rad opštinskih/gradskih organizacija,
 - prema potrebi saziva koordinaciju izabranih dužnosnika NBL-a,
 - usklađuje rad savjeta i drugih oblika djelovanja organiziranih na nivou NBL-a i brine se o obezbjeđenju materijalnih, finansijskih i tehničkih uslova za njihovo djelovanje,
 - provodi zaključke Glavnog odbora u pogledu sticanja, čuvanja, zaštite i raspolaganja imovinom NBL-a,
 - obavlja i druge poslove u skladu sa Statutom NBL-a i odlukama organa NBL-a.
- Generalni sekretar NBL-a za svoj rad odgovara Glavnom odboru, Predsjedništvu i Predsjedniku NBL-a.

3. Stručna služba

Član 55.

Stručna služba NBL-a je izvršno i stručno-operativno tijelo NBL-a. Radom Stručne službe NBL-a rukovodi Generalni sekretar NBL-a.

Član 56.

Organizacija i sistematizacija Stručne službe uređuje se Pravilnikom o organizaciji i sistematizaciji koji na prijedlog Generalnog sekretara donosi Predsjedništvo NBL-a.

4. Komisije

Član 57.

Radi odlučivanja u pojedinim oblastima ili proučavanja pojedinih pitanja i pripremanja prijedloga rješenja, Predsjedništvo NBL-a imenuje Komisije.

Komisije se obrazuju od članova Predsjedništva i Glavnog odbora, a u njihov sastav mogu ući i drugi članovi NBL-a.
Odlukom o imenovanju komisija Predsjedništvo će u skladu sa ovim Statutom odrediti nadležnosti komisija.

5. Forum mladih

Član 58.

Forum mladih je posebna organizacija mladih članova do 35. godina starosti. Forum mladih svojim prisustvom na raznim tribinama, seminarima, debatama predstavlja NBL, te svojim raspravama i idejama daje doprinos u jačanju i širenju ideje NBL-a. O svojim aktivnostima tokom godine, Forum mladih je dužan da dostavi godišnji izvještaj Predsjedniku NBL-a.

b) TERITORIJALNA ORGANIZACIJA

Član 59.

- Mjesni odbor
- Gradski/Općinski odbor
- Koordinacioni odbor

Mjesni odbor je osnovna jedinica političkog organizovanja NBL-a. Mjesni odbor se formira na području mjesne zajednice grada/općine prema trenutnoj organizaciji gradova/općina u Bosni i Hercegovini.

Mjesni odbor se sastoji od:

- 5 članova/ca, kad na teritoriji mjesne zajednice, u kojoj se formira mjesni odbor, ima do 10 i više aktivnih članova/ica koji/e imaju prijavljeno prebivalište u mjesnoj zajednici,
- 10 članova/ica, kad na teritoriji mjesne zajednice, u kojoj se formira mjesni odbor, ima do 30 i više aktivnih članova/ica koji/e imaju prijavljeno prebivalište u mjesnoj zajednici,

-15 članova/ica, kad na teritoriji mjesne zajednice, u kojoj se formira mjesni odbor, ima do 50 i više aktivnih članova/ca koji/e imaju prijavljeno prebivalište u mjesnoj zajednici,

Jedan od članova/ca mjesnog odbora je predsjednik/ca. Predsjednik/ca mjesnog odbora rukovodi radom i vodi sjednice mjesnog odbora.

Članove/ice mjesnog odbora biraju svi aktivni članovi/ce NBL-a koji imaju prijavljeno prebivalište u mjesnoj zajednici za koju se bira mjesni odbor.

Članovi/ce mjesnog odbora biraju predsjednika/icu mjesnog odbora.

Mjesni odbor je zadužen da promovira ideje NBL-a na teritoriji mjesne zajednice, da radi na popunjavanju NBL-a novim članovima/cama, da provodi izbornu kampanju na teritoriji mjesne zajednice, da organizuje logističku podršku za posmatrača i praćenje regularnosti izbora na biračkim mjestima u svojoj mjesnoj zajednici, prema planu dostavljenom od Stručne službe NBL-a.

Mjesni odbor imenuje sekretara/ku mjesnog odbora. Sekretar/ka mjesnog odbora, pored toga što mora biti aktivni član/ica NBL-a, mora imati i prijavljeno prebivalište u mjesnoj zajednici za koju se imenuje za sekretara/ku mjesnog odbora.

Mjesni odbor ima obavezu održavanja sjednica svakih 15 dana. Mjesni odbor je obavezan najmanje jednom u dva (2) mjeseca održavati sjednicu na kojoj su prisutni i svi članovi/ce NBL-a sa teritorije te mjesne zajednice, a koji nisu imenovani u organe NBL-a niti su nosioci mandata u ime NBL-a na bilo kojem nivou vlasti.

Sekretar/ka mjesnog odbora je zadužen/a da dostavlja sve materijale članovima/icama mjesnog odbora, da vodi zapisnike sa sjednica mjesnog odbora, da sve izvještaje i zaključke sa sjednica mjesnog odbora dostavlja Stručnoj službi NBL-a, kao i da obavlja sve tehničke poslove koje mu naloži mjesni odbor ili Stručna služba NBL-a.

Građanin/ka Bosne i Hercegovine koji/a se želi priključiti NBL-u, obavezan/a je mjesnom odboru dostaviti obrazac pristupnice i peti primjerak uplatnice za članarinu (ukoliko želi da bude aktivni član/ca). Građanin/ka Bosne i Hercegovine koji živi izvan Bosne i Hercegovine, kao i građanin/ka koji živi u mjesnoj zajednici u kojoj nema formiran mjesni odbor, obrazac pristupnice i peti primjerak uplatnice za članarinu dostavlja direktno Stručnoj službi NBL-a. Sekretar/ka mjesnog odbora kopiju obrasca pristupnice i kopiju petog primjerka uplatnice dostavlja Stručnoj službi NBL-a, dok original obrasce ostavlja u arhivi mjesnog odbora.

Mandat mjesnog odbora traje jednu (1) godinu

Mandat Sekretaru/ki mjesnog odbora traje pet (5) godina.

Članovima/icama i Sekretaru/ki mjesnog odbora mandat može isteći prije roka u slučaju ako član/ica ili sekretar/ka izgubi status aktivnog člana/ce NBL-a na način propisan u članu 16. ovog Statuta, ili na zahtjev najmanje deset (10) članova/ica koji ga je izabrao u mjesni odbor.

Gradski/općinski odbor osniva se kad na teritoriji grada/općine imaju uspostavljena najmanje tri mjesna odbora.

Mjesni odbori koji broje: 5 članova/ica imenuju jednog predstavnika, 10 članova/ica imenuju dva predstavnika i 15 članova/ica tri predstavnika u gradski/općinski odbor.

Članovi/ce gradskog/općinskog odbora po automatizmu su načelnik/ica, gradonačelnik/ica, odbornici/vijećnici-ce i zastupnici/ce na svim nivoima zakonodavne vlasti koji su na izborima dobili mandat, te imenovani/e zvaničnici/e u izvršnoj vlasti na svim nivoima, a čije je mjesto prebivališta na području tog gradskog/općinskog odbora.

Jedan od članova/ca gradskog/općinskog odbora je predsjednik/ca. Ukoliko, stranka ima svoga načelnika/cu izabranog/mnu na izborima, on/a je i predsjednik/ca gradskog/općinskog odbora.

Gradski / općinski odbor je zadužen da kreira politiku stranke na teritoriji grada/općine. Odgovoran je za organizaciju kampanje na teritoriji općine i organizaciju nadzora provedbe izbora, kao i prikupljanja rezultata izbora na nivou općine prema planu Stručna služba NBL-a.

Odluke i stavovi gradskog/općinskog odbora su obavezujući za sve nosioce mandata u ime NBL-a na gradskom/općinskom nivou.

Gradski/općinski odbor zasjeda jednom mjesečno.

Mandat članovima/cama gradskog/općinskog odbora traje dvije (2) godine, a nosiocima mandata na gradskom/općinskom i ostalim nivoima vlasti, mandat u gradskom/općinskom odboru traje do kraja mandata u izvršnoj i zakonodavnoj vlasti.

Gradski odbor imenuje sekretara/ku na period od pet (5) godina

Sekretar/ka gradskog/općinskog odbora je zadužen/a da dostavlja sve materijale članovima/cama odbora, da vodi zapisnike sa sjednica gradskog / općinskog

odbora, da sve izvještaje i zaključke sa sjednica odbora dostavlja Stručnoj službi NBL-a, kao i da obavlja sve tehničke poslove koje mu naloži gradski/općinski odbor ili Stručna služba NBL-a.

Članovima/cama i Sekretaru/ki gradskog/općinskog odbora mandat može isteći prije roka u slučaju ako član/ica ili sekretar/ka gradskog/općinskog odbora izgubi status aktivnog člana/ce NBL-a na način propisan u članu 16. ovog Statuta, ili na zahtjev mjesnog odbora koji ga je delegirao u gradski/općinski odbor.

Koordinacioni odbor broji 12 članova/ica koje imenuje Glavni odbor i koji imaju obavezu da koordinišu i uvezuju rad općinskih odbora. Iz svake regije se imenuju po 2 (dva) člana koordinacionog odbora. Svaka regija predlaže listu od četiri kandidata za člana koordinacionog odbora. Predložene članove sa liste bira i potvrđuje Predsjedništvo stranke.

Svi općinski odbori grupišu se po regijama i to :

Regija 1.

Velika Kladuša, Sanski Most, Ključ, Cazin, Bihać, Bosanska Krupa, Bosanski Petrovac, Bužim, Novi Grad, Prijedor, Oštra Luka, Krupa na Uni, Kozarska Dubica, Kostajnica, Prnjavor, Srbac, Gradiška, Laktaši, Istočni Drvar, Kupres RS, Šipovo, Ribnik, Petrovac, Mrkonjić Grad, Banja Luka, Jezero, Čelinac, Kotor Varoš, Kneževo.

Regija 2.

Odžak, Orašje, Domaljevac/Šamac, Doboj Istok, Gradačac, Gračanica, Lukavac, Srebrenik, Čelić, Tuzla, Banovići, Živinice, Teočak, Sapna, Kalesija, Kladanj, Brčko, Bijeljina, Ugljevik, Šamac, Pelagićevo, Donji Žabar, Lopare, Vlasenica, Zvornik, Šekovići, Srebrenica, Osmaci, Bratunac, Milići, Modriča, Vukosavlje, Brod, Derвента.

Regija 3.

Žepče, Zenica, Zavidovići, Usora, Doboj Jug, Maglaj, Tešanj, Visoko, Breza, Olovo, Kakanj, Vareš, Travnik, Vitez, Novi Travnik, Kreševo, Kiseljak, Jajce, Gornji Vakuf- Uskoplje, Fojnica, Donji Vakuf, Busovača, Bugojno, Dobretići, Teslić, Doboj, Petrovo, Stanari.

Regija 4.

Foča - Ustikolina FBiH, Goražde, Pale - Prača FBiH, Bileća, Ljubinje, Trebinje, Rudo, Novo Goražde, Nevesinje, Višegrad, Kalinovik, Gacko, Čajniče, Berkovići, Foča RS.

Regija 5.

Neum, Mostar, Stolac, Čapljina, Prozor-Rama, Konjic, Jablanica, Ravno, Čitluk, Ljubuški, Posušje, Grude, Široki Brijeg, Drvar, Glamoč, Kupres FBiH, Livno, Tomislavgrad, Bosansko Grahovo.

Regija 6.

Hadžići, Ilidža, Novi Grad Sarajevo, Trnovo FBiH, Ilijaš, Vogošća, Centar Sarajevo, Stari Grad Sarajevo, Novo Sarajevo, Trnovo RS, Han Pijesak, Istočna Ilidža, Istočni Stari Grad, Sokolac, Rogatica, Pale RS.

Za koordinaciju općina iz jedne regije su zadužena dva člana/ice koordinacionog odbora.

Koordinacioni odbor ima obavezu da preuzima sve prijedloge općinskih odbora (svaka dva člana/ice za svoju regiju) za kandidate/kandidatkinje na entitetskim i kantonalnim nivoima, sve prijedloge za rukovodeća mjesta koja su poslije izbora pripala stranci.

Koordinacioni odbor također ima obavezu da preuzima sve zahtjeve prema kantonima ili entitetima od općinskih odbora, a koji se tiču promjene zakonske legislative u cilju poboljšanja funkcionisanja lokalne samouprave, koji se putem Glavnog odbora prenose kao zadaci na sve nosioce mandata iz stranake na nivou entiteta ili kantona.

Koordinacioni odbor ima obavezu da u svom radu komunicira sa svim predsjednicima općinskih odbora i svim nosiocima mandata na kantonalnom nivou, kako bi svoje usaglašene prijedloge dostavljali Glavnom odboru stranke na nadležnost.

VI - KLUBOVI ZASTUPNIKA-VIJEĆNIKA-ODBORNIKA

Član 60.

Kandidati NBL-a izabrani u organe zakonodavne vlasti na redovnim izborima na bilo kojem nivou formiraju klub zastupnika-vijećnika-odbornika NBL-a. U sastav kluba zastupnika-vijećnika-odbornika NBL-a mogu pristupiti samostalni i nezavisni zastupnici/e-vijećnici/e-odbornici/e kao i drugi zastupnici/e- vijećnici/e-odbornici /e koji/e postanu aktivni članovi/ce NBL-a, ukoliko postoji zakonska mogućnost za isto.

Član 61.

Članovi/ce kluba zastupnika-vijećnika-odbornika NBL-a iz svojih redova, uz saglasnost Predsjedništva NBL-a za državni nivo, za entitetski nivo, za kantonalni nivo i Gradskog /Općinskog odbora za gradski/općinski nivo, biraju predsjednika/cu. Klub zastupnika-vijećnika-odbornika NBL-a donosi Poslovnik o svom radu, na koji saglasnost daje Predsjedništvo NBL-a za državni nivo, za entitetski nivo, za kantonalni nivo i Gradski/Općinski odbor za gradski/općinski nivo.

VII - POSLOVANJE I FINANSIRANJE STRANKE

Član 62.

NBL stiče finansijska sredstva i ostalu imovinu od članarine, finansijske i materijalne pomoći članova/ca i simpatizera/ki, iz budžeta, vlastite djelatnosti i drugih izvora.

Imovina NBL-a se sastoji od novca, pokretnih stvari, nekretnina, vrijednosnih papira i prava.

NBL može biti osnivač i suosnivač preduzeća i drugih subjekata za obavljanje privredne i druge djelatnosti. Kad je zakonom dopušteno NBL može neposredno obavljati privrednu djelatnost.

Generalni sekretar NBL-a upravlja imovinom i vodi poslovanje stranke, te u ime NBL-a ispunjava prava i dužnosti koje proizilaze iz položaja osnivača preduzeća ili drugog oblika privredne aktivnosti.

Član 63.

NBL ima glavni KM i devizni račun na koji liježu sredstva iz svih izvora finansiranja.

Podračun glavnog KM računa imaju: Stručna služba NBL-a, Predsjedništvo NBL-a, Koordinacioni odbor i Gradski/Općinski odbor.

Na kraju svakog kalendarskog mjeseca, Generalni sekretar NBL-a sa glavnog računa prebacuje na podračun : Stručnoj službi NBL-a 50% sredstava, Koordinacionog odbora 20% sredstava , a sva ostala sredstva prebacuje na podračun Predsjedništva NBL-a.

VIII - KANDIDATSKE LISTE

Član 64.

Kandidatske liste NBL-a, za sve nivoe vlasti za koje se provode redovni izbori u BiH, se formiraju najkasnije do kraja kalendarske godine, prije godine u kojoj se provode redovni izbori.

Kandidate/kinje za kandidatsku listu za gradsko/općinsko vijeće odnosno Skupštinu grada/općine predlažu mjesni odbori. Broj predloženih kandidata/kinja mjesnog odbora zavisi od broja članova/ica mjesnog odbora i taj broj za svaki mjesni odbor za lokalne izbore utvrđuje Generalni sekretar NBL-a i predlaže Predsjedništvu na dalje odlučivanje. Odluke Predsjedništva stranke o kandidatima na izbornim listama su konačne i obvezujuće.

Kandidate/kinje za kandidatsku listu Načelnika/ce Općine i Gradonačelnika/ce predlaže Gradski/općinski odbor i na kandidatskoj listi moraju biti najmanje tri (3) kandidata/kinje .

Kandidate/kinje za kandidatsku listu za kantonalni nivo predlažu Gradski / općinski odbori iz tog kantona. Broj predloženih kandidata/kinja Gradskog / općinskog odbora zavisi od broja članova/ica Gradskog/općinskog odbora i taj broj za svaki Gradski/općinski odbor za opće izbore utvrđuje Generalni sekretar NBL-a.

Kandidate/kinje za kandidatsku listu za entitetski nivo predlažu Gradski/općinski odbori za izbornu jedinicu u kojoj se nalaze. Broj predloženih kandidata/kinja Gradskog/općinskog odbora zavisi od broja članova/ica Gradskog/općinskog odbora i taj broj za svaki Gradski/općinski odbor za opće izbore utvrđuje Generalni sekretar NBL-a.

Kandidate/kinje za kandidatsku listu za državni nivo predlaže Glavni odbor na osnovu usaglašenih prijedloga Koordinacionog odbora.

Kandidate/kinje za člana Predsjedništva BiH predlaže Predsjedništvo NBL-a . Predsjedništvo NBL-a na kandidatsku listu za člana Predsjedništva BiH iz reda jednog od konstitutivnih naroda , na osnovu trenutnog ustavnog uređenja BiH , mora predložiti najmanje tri (3) kandidata/kinje.

Na kandidatsku listu za Načelnika/cu i Gradonačelnika/cu i gradsko/općinsko vijeće odnosno Skupštinu grada/općine u ime NBL-a dolaze kandidati/kinje koji/e dobiju najviše glasova od svih aktivnih članova/ica NBL-a, a za druge nivoe glasaju članovi/ce mjesnih odbora, gradskih/općinskih odbora. Redoslijed na kompenzacijskim listama , za nivoe koji imaju kompenzacijske liste, utvrđuje Predsjedništvo stranke.

Procedure za izbor kandidata na kandidatske liste svih nivoa utvrđuju se Pravilnikom o kandidovanju i vođenju kadrovske politike čiji nacrt predlaže Kadrovska komisija a konačnu verziju donosi i usvaja Predsjedništvo stranke.

IX - IZBORI

Član 65.

Izbori u NBL-u mogu biti redovni i vanredni.

Redovni izbori za sve organe i tijela na svim nivoima NBL-a održavaju se svake četiri godine.

Odluku o raspisivanju redovnih izbora donijet će Glavni odbor istovremeno sa Odlukom o sazivanju redovnog Kongresa NBL-a.

Odluka o raspisivanju redovnih izbora sadrži:

- vrijeme održavanja izbora na svim nivoima sa rokovima za provođenje pojedinih izbornih radnji,
- imenovanje Apelacione komisije i Izborne komisije NBL-a,
- imenovanje odbora za pripremu Kongresa
- druga pitanja po potrebi.

Izborne komisije iz prethodnog člana imenuju se na period od četiri godine.

Član 66.

Vanredni izbori provode se na način i po proceduri kao i redovni izbori, a mogu se raspisati u skladu sa Pravilima izbornog postupka.

Odluku o raspisivanju vanrednih izbora za cijeli NBL donijet će Glavni odbor, sa 2/3 glasova od ukupnog broja njegovih članova sazivanjem vanrednog Kongresa NBL-a.

Odluku o raspisivanju vanrednih izbora za niže organe NBL-a donijet će taj organ, sa 2/3 glasova od ukupnog broja njegovih članova.

Vanredni izbori u nižim organima NBL-a provode se i nakon uvođenja povjereništva u tom organu, a u skladu sa Statutom i Pravilima izbornog postupka. Mandat izabranih organa i funkcionera na vanrednim izborima, u skladu s odredbama ovog člana, traje do potvrđivanja rezultata sljedećih redovnih izbora.

a) Razrješenje, raspuštanje organa i provjera povjerenja

Član 67.

Predsjedništvo NBL-a ima pravo razriješiti općinske/gradske organizacije u cjelini ili djelimično, kao i njihove pojedine članove, ako ocijeni da djeluju u suprotnosti

sa Statutom, Programom i drugim aktima i odlukama organa NBL-a i time ugrožavaju ugled ili nanose drugu štetu NBL-u.

Kada ocijeni neophodnim, zbog naročito teške situacije u organizacijama NBL-a Predsjedništvo NBL-a može raspustiti sve organe NBL-a tog nivoa.

Koordinacioni odbor može Predsjedništvu NBL-a predložiti razriješenje/raspuštanje organa općinske/gradske/organizacije.

Kada se razriješi neki odbor u cjelini, odnosno kada se raspusti, Predsjedništvo će imenovati povjerenika ili povjereništvo koje će voditi poslove razriješenog organa/raspuštene organizacije do novog izbora.

Protiv odluka može se podnijeti žalba Glavnom odboru u roku od 15 dana, koji je dužan na prvoj narednoj sjednici donijeti odluku po žalbi.

Žalbe iz prethodnog stava ne odlažu izvršenje, a odluke koje se donesu povodom tih žalbi su konačne.

Ukoliko, zbog opravdanih razloga u pojedinim općinskim organizacijama nije moguće provesti redovne izbore, Predsjedništvo NBL-a za takve općinske organizacije imenuje povjereništvo sa mandatom od dvije godine, s tim što će u odluci o imenovanju povjereništva odrediti da će se provesti izbori kada se za to steknu uslovi i ukoliko do isteka tekućeg mandata nije ostalo više od dvije godine. Predsjedništvo NBL-a će Pravilima izbornog postupka bliže urediti uslove i procedure kandidovanja, postupak i proces glasanja, proceduru žalbenog postupka, prava i obaveze biračkih odbora, utvrđivanje biračkih mjesta, objavu rezultata izbora, dodjelu mandata, osiguranje nacionalne zastupljenosti, zastupljenosti mladih i žena, kao i druga pitanja od značaja za izbore u NBL-u, a dužno ih je donijeti 30 dana od dana stupanja na snagu ovog Statuta.

X - PRESTANAK RADA STRANKE

Član 68.

Prestanak članstva u NBL-u, prestanak rada ili raspuštanje organizacionih oblika ne dopušta nikome bilo kakvo pravo na imovinu NBL-a.

NBL može prestati djelovati odlukom Kongresa, za koju je potrebna dvotrećinska većina glasova ukupnog broja delegata/tkinja Kongresa. Odlukom o prestanku rada stranke Kongres će odlučiti o imovini NBL-a.

XI - POSEBNE ODREDBE

Član 69.

Svi organi u NBL-u su samostalni u svom radu i obavezni su da provode politiku Stranke za nivo za koji su nadležni, kao i da kreiraju i podržavaju sve zakonske norme koje u konačnici vode ka stvaranju Bosne i Hercegovine onakvom kakva je opisana u programskom dokumentu propisanom u ovom Statutu.

Organi stranke su obavezni da poslije osnivanja donesu svoje Pravilnike o načinu rada, koji moraju biti u skladu sa Statutom.

Glavni odbor ima mandat, da ukoliko neki od organa NBL-a ne poštuje programske ciljeve stranke, poništi odluke i zaključke tog organa i smjeni sve članove/ice tog organa koji su glasali za osporene odluke i zaključke.

Predsjednici i Sekretari: mjesnih odbora, gradskih/općinskih odbora, članovi/ce Koordinacionog odbora, Predsjedništva stranke i Glavnog odbora imaju pravo na mjesečnu naknadu za svoj angažman u stranci.

Odluke o visini naknade iz stava (4) ovog člana donose: gradski /općinski odbor za nivo općine, Glavni odbor za Predsjedništvo i Koordinacioni odbor.

Pozicije predsjednika/ice organa stranke može jedna osoba obavljati u dva mandata, osim u slučaju predsjednika/ice gradskog/općinskog odbora kada NBL ima u tom gradu/općini Načelnika/cu i za sve vrijeme trajanja mandata Načelnika/ice ta osoba je ujedno i Predsjednik/ca gradskog/ općinskog odbora.

Propis iz stava (6) ovog člana odnosi se na jedan organ. Jedna osoba može biti u dva mandata predsjednik/ca mjesnog odbora i da dalje bude predsjednik/ca nekog većeg organa Stranke.

XII - ZAVRŠNE ODREDBE

Član 70.

Statut NBL-a stupa na snagu danom donošenja i može se mijenjati i dopunjavati svake 4 (četiri) godine.